



REPUBLIKA E KOSOVËS / REPUBLIKA KOSOVA

A.A.nr.3/2022

GJYKATA SUPREME E KOSOVËS – kolegji i përbërë nga gjyqtarët: Shukri Sylejmani, kryetar, Fejzullah Rexhepi dhe Nenad Laziq, anëtarë, në çështjen juridike të gjyqtarit të Gjykatës së Apelit të Kosovës, Y.Sh., në procedurën sipas kërkesës AD/GJA nr.02/22 datë 09.03.2022, të autoritetit kompetent për fillimin e hetimeve disiplinore në pajtim me Ligjin nr. 06/L-057 për Përgjegjësinë Disiplinore të gjyqtarëve dhe prokurorëve, dhe Ligjin nr. 08/L-003 për ndryshimin dhe plotësimin e këtij ligji, duke vendosur sipas ankesës së gjyqtarit Y.Sh., i përfaqësuar nga avokat N.P., nga Prishtina, të paraqitur kundër vendimit të Këshillit Gjyqësor të Kosovës, KGJK.nr.114/2022 datë 10.03.2022, në seancën e kolegjit të mbajtur më 12.04.2022, merr këtë:

A K T V E N D I M

Konfirmohet vendimi i Këshillit Gjyqësor të Kosovës KGJK.nr.114/2022 datë 10.03.2022, ndërsa ankesa e Y.Sh., - gjyqtar në Gjykatën e Apelit të Kosovës, e paraqitur kundër këtij vendimi, refuzohet si e pa bazuar.

A r s y e t i m

Me vendimin e Këshillit Gjyqësor të Kosovës, KGJK.nr.114/2022 datë 10.03.2022, është suspenduar nga detyra e gjyqtarit Y.Sh., gjyqtar në Gjykatën e Apelit të Kosovës në Prishtinë, deri në një vendim tjetër të Këshillit, i cili dhe gjatë kësaj periudhe do të pranojë vetëm 50% të pagës mujore, vendim ky i cili hyn në fuqi që nga data 10.03.2022.

Kundër vendimit të lartpërmendur, gjyqtari Y.Sh., me kohë ka paraqitur ankesë duke mos cekur shprehimisht bazat ankimore në kuptim të nenit 15.4. 1, 2 dhe 3 të Ligjit Nr.06/L-057 në fuqi që nga data 11.01.2019, i ndryshuar dhe i plotësuar me Ligjin nr.08/L-003 i publikuar në Gazetën Zyrtare të Kosovës nr.8/2021 datë 21.10.2021, por me pretendim se me vendimin e ankimuar gabimisht është vërtetuar gjendja faktike dhe po ashtu, edhe e drejta materiale gabimisht është zbatuar, me propozim që siç thuhet në ankesë „Gjykata Supreme e Kosovës të shqyrtojë edhe një herë këtë çështje dhe të nxjerrë vendim të drejtë dhe të bazuar”.

Këshilli Gjyqësor i Kosovës, në përgjigje në ankesën e gjyqtarit Y.Sh., kontestoi në tërësi thëniet ankimore të tij dhe propozoi që kjo ankesë të refuzohet si e pabazuar, ndërsa vendimi i kontestuar me ankesë, të mbetet në fuqi.

Gjykata Supreme e Kosovës, në kuptim të nenit 15 pika 4 të Ligjit nr. 06/L-057 për Përgjegjësinë Disiplinore të gjyqtarëve dhe prokurorëve dhe në kuptim të Ligjit nr. 08/L-003 për ndryshimin dhe plotësimin e këtij ligji, shqyrtoi ankesën e paraqitur nga gjyqtari Y.Sh., vendimin e ankimuar, si dhe shkresat e lëndës, dhe gjeti se:

Ankesa e paraqitur nga gjyqtari Y.Sh., është e pabazuar.

Me vendimin e ankimuar, KGJK.nr.114/2022 datë 10.03.2022, pas shqyrtimit të kërkesës së autoritetit kompetent për inicim të procedurës disiplinore ndaj gjyqtarit Y. Sh., ky gjyqtar është suspenduar nga detyra e gjyqtarit deri në një vendim tjetër të Këshillit, dhe bazuar në nenin 11 të Rregullores nr. 05/2019, për Procedurën Disiplinore të Gjyqtarëve është themeluar Paneli hetimor për të hetuar shkeljen e supozuar disiplinore të gjyqtarit Y.Sh.. Këshilli Gjyqësor i Kosovës, duke u bazuar në nenin 2 të Ligjit nr. 08/L-003 për plotësimin dhe ndryshimin e Ligjit nr. 06/L-057 për Përgjegjësinë Disiplinore të Gjyqtarëve dhe Prokurorëve, sipas detyrës zyrtare ka shqyrtuar dhe vlerësuar çështjen e suspendimit të gjyqtarit në fjalë dhe ka vendosur për suspendimin e saj, në tërësi si në dispozitivin e vendimit të ankimuar, duke vlerësuar se suspendimi i gjyqtarit në këtë fazë të procedurës do të krijojë parakushte që Paneli hetimor të hetojë në tërësi çështjen në mënyrë objektive duke pamundësuar çfarëdo ndikimi në procedurën disiplinore dhe duke konstatuar se suspendimi i gjyqtarit në fjalë nuk prejudikon mënyrën e zhvillimit të procedurës dhe as përfundimin e saj, por e lehtëson procesin e hetimit disiplinor. Vendimi është bazuar në nenin 2 të Ligjit nr. 08/L-003 për ndryshimin dhe plotësimin e Ligjit nr. 06/L-057 për Përgjegjësinë Disiplinore të Gjyqtarëve dhe Prokurorëve dhe në nenin 12 paragrafi 10 të këtij Ligji.

Në një gjendje të tillë të çështjes, Gjykata Supreme e Kosovës, pranon në tërësi si të drejtë dhe të ligjshëm vendimin e ankimuar, pasi që i njëjti është në tërësi në Ligj i bazuar, dhe me këtë rast u pranuan si të bazuara të gjitha konstatimet faktike dhe juridike të Këshillit Gjyqësor të Kosovës, të precizuara në tërësi si në këtë vendim. Suspendimi i gjyqtarit Y. Sh., ka ardhur gjatë zhvillimit të rregullt të procedurës disiplinore ndaj gjyqtarit në fjalë, duke u bazuar në mënyrë të drejtë në nenin 2 të Ligjit nr. 08/L-003 për ndryshimin dhe plotësimin e Ligjit nr. 06/L-057 për Përgjegjësinë Disiplinore të Gjyqtarëve dhe Prokurorëve, me të cilin neni 12 paragrafi 9 i këtij Ligji riformulohet si vijon: *gjatë procedurës hetimore, Këshilli eks oficio ose me kërkesë të autoritetit kompetent i cili ka kërkuar fillimin e hetimeve mund të suspendoj gjyqtarin ose prokurorin i cili është në hetime nëse një gjë e tillë është e nevojshme duke marrë parasysh seriozitetin e shkeljes së supozuar disiplinore dhe të sigurohet integriteti dhe efektiviteti i hetimeve.* Së këndejmi edhe Gjykata Supreme gjen se përmes këtij vendimi, krijohen parakushtet që Paneli hetimor mund të hetoj në tërësi çështjen në mënyrë objektive duke pamundësuar çfarëdo ndikimi në procedurën disiplinore.

Në këtë kontest, u refuzuan si të pabazuara pretendimet e ankesës se suspendimi i ankuesit këtu gjyqtarit Y.Sh., është në kundërshtim me nenin 2 të Ligjit nr. 08/L-003 për plotësimin dhe ndryshimin e Ligjit nr. 06/L-057 për Përgjegjësinë Disiplinore të Gjyqtarëve dhe Prokurorëve, të cilës dispozitë i është referuar Këshilli Gjyqësor, me rastin e marrjes së vendimit të kontestuar,

Në ankesë, gjyqtari Y.Sh., cek se ngase vendimi i kontestuar nuk përmban arsye për rrethanat konkrete që provojnë „ seriozitetin e shkeljes së supozuar” dhe pse suspendimi është i nevojshëm për të ruajtur „ integritetin dhe efektivitetin e hetimeve”, më tutje, ky vendim nuk jep arsyetim për faktet vendimtare që imponojnë suspendimin e menjë herëshëm pas paraqitjes së ankesës nga pala paditëse në një procedurë kontestimore në të cilën ankuesi si gjyqtar kishte për të vendosur, pastaj nuk ka vlerësuar drejtë faktet që kanë rëndësi vendimtare për masën e suspendimit: baza e arsyeshme se është kryer shkelje disiplinore, provat mbështetëse, origjinën dhe autenticitetin e provave, kush i ka parashtruar provat dhe si janë siguruar ato prova, a kishte mundësi objektivisht parashtruesi i provave ti siguroj ato dhe se a janë të vlefshme ato prova.

Pretendimet ankimore të lartë cekura u vlerësuan si të pa bazuara, për arsye se Gjykata Supreme sikur edhe Këshilli Gjyqësor i Kosovës, konsideron se janë plotësuar

kushtet ligjore sipas nenit 2 të Ligjit nr. 08/L-003 për ndryshimin dhe plotësimin e Ligjit nr. 06/L-057 për Përgjegjësinë Disiplinore të Gjyqtarëve dhe Prokurorëve, me të cilin neni 12 paragrafi 9 i këtij Ligji riformulohet ashtu që *gjatë procedurës hetimore, Këshillit i është dhënë mundësia ligjore që eks oficio ose me kërkesë të autoritetit kompetent i cili ka kërkuar fillimin e hetimeve të mund të suspendoj gjyqtarin ose prokurorin i cili është në hetime nëse një gjë e tillë është e nevojshme duke marrë parasysh seriozitetin e shkeljes së supozuar disiplinore dhe të sigurohet integriteti dhe efektiviteti i hetimeve*. Në rastin e suspendimit të gjyqtarit Y.Sh., kundër tij është filluar një hetim për shkelje disiplinore nga një autoritet kompetent dhe shkelja e supozuar disiplinore është mjaft serioze, dhe në fund kjo masë e suspendimit mundëson zhvillimin e një hetimi të paanshëm dhe efektiv të përgjegjësive disiplinore të ankuesit-gjyqtarit Y.Sh.. Në këtë vendim ka qenë jo e domosdoshme që të konstatohen rrethanat përkitazi me llojin, dhe karakterin e shkeljes së supozuar, ngase këto janë evidente në kërkesën e autoritetit kompetent për inicimin e përgjegjësive disiplinore dhe se për atë shkelje të supozuar do të zhvillohet procedurë disiplinore. Arsyetimi për masën e suspendimit, ka të bëjë kryesisht me bazën ligjore për caktimin e një mase të tillë, e cila pa dyshim ekziston, dhe për sigurimin e kushteve përmes kësaj mase të suspendimit, që Paneli hetimor të hetoj në tërësi çështjen në mënyrë objektive duke pamundësuar çfarëdo ndikimi në procedurën disiplinore. Ndërsa rrethanat tjera në të cilat ankuesi pretendon në ankesë, janë relevante dhe mund të vërtetohen gjatë zhvillimit të procedurës disiplinore ndaj këtij gjyqtari. Nga kjo që u tha, rezulton se vendimi i ankimuar është në përputhje të plotë me nenin 2 të Ligjit nr. 08/L-003 për plotësimin dhe ndryshimin e Ligjit nr. 06/L-057 për Përgjegjësinë Disiplinore të Gjyqtarëve dhe Prokurorëve, andaj pretendimet ankimore të ankuesit në këtë drejtim u refuzuan si të pa bazuara.

Gjykata Supreme e Kosovës, pranon në tërësi konstatimin e Këshillit Gjyqësor të Kosovës, në vendimin e ankimuar, se suspendimi i gjyqtarit nuk prejudikon mënyrën e zhvillimit të procedurës dhe as përfundimin e procedurës, por e lehtëson procesin e hetimit disiplinor, andaj pretendimet ankimore të paraqitura në këtë drejtim u vlerësuan si të pabazuara.

Gjykata Supreme e Kosovës, vlerësoi se ishte irelevant pretendimi ankimor se Këshilli Gjyqësor i Kosovës nuk ka asnjë provë a indikacion se ankuesi ka bërë ndonjë përpjekje për pengimin e zbatimit të procedurës, pengimit të hetimit apo që do të pengonte efikasitetin e hetimeve, pasi që me shqiptimin e masës së suspendimit arrihet që të

eliminohet mundësia e këtij pengimi nga ana e ankuesit të zhvillimit të hetimit dhe përfundimit të procedurës, dhe kësi soji lehtësohet procesi i hetimit disiplinor, çka është edhe qëllimi ligjor i suspendimit, kështu që nuk është e domosdoshme që të ketë prova dhe indikacione për përpjekjet e ankuesit për tentimin e ndikimit apo pengimit të zhvillimit të kësaj procedure nga se suspendimi shqiptohet me qëllim të evitimit të këtij pengimi, e jo pasi që nga ankuesi të tentohet pengimi i zhvillimit të procedurës, apo ndikimi në zhvillimin e kësaj procedure.

Për arsyet e paraqitura më lart, në bazë të nenit 15 pika 5 dhe 6 të Ligjit të lartë përmendur u vendos si në dispozitiv të këtij aktvendimi.

GJYKATA SUPREME E KOSOVËS-PRISHTINË

A.A.nr. 3/2022, më 12.04.2022

Kryetari i kolegjit,
Shukri Sylejmani